



26. juli 2013

UKA 2013/45

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

**Imigassamik sassaallernermi, tuniniaanermilu tuniniaanerup killinga naleqqussarneqarsinnaanera aallaavigalugu apeqquteqaat aallaavigalugu oqallisissiaq.**

(Inatsisartunut ilaasortat Siverth K. Heilmann amma Gerhardt Petersen, Atassut)

**Tunnngavilersuut:**

Nunatsinni imigassamik tuniniaaneq sassaallersinnaanerlu annertuumik killilersuiffigineqarluni ingerlanneqarpoq, Atassut-millu isumaqarpugut killilersuineq ajornartorsiutinut qaangiiniarnermi kisimi aqputiginiassallugu pitsaanerpaanngitsoq. Taamaattumik Atassut-mit isumaqarpugut imigassamik tuniniaaneq sassaallersinnaanerlu ammanerusumik ingerlanneqalersinnaaneri ammaffigineqartariaqartoq. Imigassamik pisiniarfinni tuniniaasinnerup killilersorneqarneratigut inuppasuit matuliivinnerini tullerriiaallutik pisiniuttarput tamannalu pisiniartunut ajoraluartumik ilaatigut pisiniartunit nuanninngitsumik misigisaqarfiusarput ingammik pisinianut meerartalinnut.

Atassut-miit isumaqarpugut ajornartorsiut tamanna qaangerneqarsinnaasoq imigassamik tuniniaasinnaanerup sivitsorneqarneratigut, nalunngilarpummi imigassamik pissarserusuittut aqputissanik allanik nassaartartut imigassatik pissarsiariniarlugit soorlu angerlarsimaffinni tuniniaasuninngaanniit. Imigassamillu pinngitsuuisinnaanngitsut imigassamik pissarsisinnaanngikkaangamik angerlarsimaffimmi immiortarput, sprit-itortarput ilaatigullu allaat ilisimaneqarpoq napparsimavinnut sprit-inik tillinniartoqartarpoq.

Imigassamik sassaallerfiusartut ammasarfiisa sivitsorneqarnerisigut inuit aalakoortutik illoqarfimmiittut piffimmi ataatsimi katersuussimatinneqarsinnaapput, taamaasillunili angerlarsimaffinni eqqissiviilliortarnerit annikillisarneqarsinnaallutik. Eqqaamassarputtaak imerniartarfiit matoreernerisa kingorna angerlarsimaffinnut nangikkiartarnerpassuit illoqatigiippassuarnut toqqissisimannngitsisartut annikillisarneqarsinnaalissammata.

Atassut-mit isumaqarpugut qinikkatut sapiissuseqartariaqartugut allannguutissanik iluaqutaasinnaasorissanillu misiliinissatsinnut, qulaani oqallisissiarisagut takorloorneqarsinnaavoq aallaqqaammut misiliutitulluunniit atuutsilerneqarsinnaaneri. Tassami misilissimanngisagut siumut aalajangiiffigisinnaanngilagut nalilersinnaanagillunniit tunnngavissaqartinnata.

Oqallilluarisi